

09 MAR 2003
Teras-Pindah

TERAS SARAN KERAJAAN KEDAH TIDAK TERGESA-GESA PINDAH PUSAT PENTADBIRAN

ALOR STAR, 9 Mac (Bernama) -- Teras Pengupayaan Melayu (Teras) menyarankan agar kerajaan Kedah tidak tergesa-gesa melaksanakan cadangan memindahkan pusat pentadbiran kerajaan negeri dari Alor Star ke Pulau Langkawi.

Presidennya, Mohd Azmi Abdul Hamid berkata pelaksanaan cadangan itu akan membawa implikasi yang rumit dan membebankan sama ada kepada kerajaan negeri dan juga rakyat.

"Teras tidak bersetuju dengan cadangan Perdana Menteri Datuk Seri Dr Mahathir Mohamad supaya pusat pentadbiran kerajaan negeri dipindahkan dari Alor Star ke Langkawi," katanya dalam satu kenyataan hari ini.

Teras ialah sebuah badan amanah yang menjalankan penyelidikan, pendidikan, penerbitan, latihan dan pengemblengan orang-orang Melayu.

Pada 1 Mac lepas, ketika merasmikan majlis pecah tanah Fasa Kedua Underwater World di Langkawi, Dr Mahathir secara spontan mencadangkan pusat pentadbiran kerajaan negeri dipindahkan dari Alor Star ke Langkawi.

Perdana Menteri dirujuk sebagai berkata langkah itu akan menambahkan lagi kehadiran pelancong ke pulau terbabit di samping Langkawi mempunyai kemudahan lapangan terbang yang membolehkan pesawat Boeing 747 mendarat berbanding hanya Boeing 737 di Lapangan Terbang Alor Star.

Sementara itu, Mohd Azmi berkata pelaksanaan cadangan terbabit akan menyulitkan majoriti rakyat Kedah yang ingin berurusan dengan agensi-agensi kerajaan akibat masalah perhubungan yang begitu jauh antara tanah besar dan Langkawi.

Beliau berkata kos perhubungan untuk berulang-alik ke Langkawi amatlah tinggi sama ada melalui jalan laut atau udara sekaligus membebankan golongan berpendapatan rendah.

Selain itu, pelaksanaannya melibatkan kos yang tinggi dan menyebabkan kerajaan negeri menanggung beban hutang, sebaliknya kos terbabit boleh digunakan untuk memajukan kawasan pedalaman yang masih ketinggalan.

Mohd Azmi berkata cadangan perpindahan itu hanya lahir secara spontan dan tidak dibuat melalui pengkajian yang menyeluruh serta sudah pasti ia tidak wajar diterima dan dilaksanakan secara tergesa-gesa.

-- BERNAMA
MAN MAN ROS